

四库全书总目

欽定四庫全書總目卷一百八十二

集部三十五

別集類存目九

萬山樓詩集二十四卷

江西巡撫
採進本

國朝許虬撰虬字竹隱長洲人順治辛卯舉人官至思南府知府其詩前數卷多擬古之作刻意摹仿頗嫌太似其擬陸機迢迢牽牛星詩後有自跋曰子已於十九首中和此題矣今復因曙戒之訂共和陸平原篇成自詠一過確是晉古非漢古也詩之升降微矣觀其持論知無往非雙鉤古帖也

萬青閣全集八卷

內府
藏本

國朝趙吉士撰吉士有續表忠記已著錄是集爲吉士所自編凡雜文二卷詩一卷勘河詩紀等十三種其一卷制藝一卷平交山寇公牘詩文一卷獻牘一卷交山在交城境姜瓖平後餘孽竄伏山中出沒爲患吉士以計討平之材略有足稱者文章則非專門也

林臥遙集三卷

浙江巡撫
採進本

國朝趙吉士撰康熙戊辰吉士由戶科給事中罷職閑居僑住宣武門西之寄園適金壇于漢翔貽詩四首吉士依韻酬荅後凡遇他題皆疊此韻積成千首命曰疊韻千律分爲上下二卷尋又續得五百餘首編爲一卷命曰千疊波餘合刻以爲此編案和韻爲詩本不能曲折如志又疊至千五百首此雖香山東坡亦斷無能工之理矣

遂初堂文集九卷

江蘇巡撫
採進本

國朝楊兆魯撰兆魯字青巖武進人順治壬辰進士官至福建延平道按察司副使兆魯官建寧時巨寇蕭維堂等作亂兆魯招撫有功集中平寇紀略述其始末頗詳惟多載案牘之文詞不雅馴

畫壁遺藁一卷

通行
本

國朝范承謨撰承謨有忠貞集已著錄康熙壬子承謨總督閩浙值逆藩耿精忠謀反巡撫劉秉政輸情於賊給承謨入見脅令從逆承謨詆罵不屈遂爲所拘繫被幽者三載備受窘毒時作爲詩歌以自抒忠憤守者屏絕筆墨乃以桴炭畫字壁上其尤激烈者輒爲賊黨攫去僅存四十七首承謨自爲之序已彙載入忠貞集中此乃石門吳震方錄入說鈴之本也

見山樓詩文集

無卷數 陝西巡撫採進本

國朝楊素蘊撰素蘊有西臺奏議已著錄其詩集刻於康熙壬子文集則無序無跋不知刻於何時均不分卷帙不列目錄皆似乎隨有所作隨以付雕其詩頗摹李夢陽文則皆應俗之作也

撫皖治略一卷撫楚治略一卷穀城水運紀略一卷

陝西巡撫採進本

國朝楊素蘊撰撫皖治略乃其官安徽巡道時條教奏疏撫楚治略皆其官湖廣巡撫時條教奏疏穀城水運紀略則素蘊官荆南道時會大軍勦逆藩吳三桂兵儲陸運頗艱因訪明季楊嗣昌勦張獻忠時水運故道修復緯路哀其文移以成是編素蘊爲御史時曾疏劾吳三桂號爲敢言此三書則皆尋常案牘也中多奏疏立入奏議類中而文告居其大半故仍附之別集類焉

張康侯詩草十一卷

陝西巡撫採進本

國朝張晉撰晉字康侯狄道人順治壬辰進士官丹徒縣知縣其詩頗學李白兼及李賀之體第一卷爲黍谷吟第二卷爲秋舫一嘯第三卷爲薊門篇第四卷爲勞勞篇第五卷爲石芝山房草第六卷七卷爲薤草第八卷爲稅雲草而以詩餘附焉第九卷爲律陶集陶詩爲五言律也第十卷爲集杜第十一卷爲集唐亦皆五言律據後跋云尙有七律集句未經編入云

慈齋存彙四卷

陝西巡撫採進本

國朝白乃貞撰乃貞字廉叔號蘂淵順治壬辰進士官翰林院檢討其詩敘述真樸不加文飾故余恂序以爲善

學香山蓋舉其近似者爾

堪齋詩存八卷

江蘇周厚
堉家藏本

國朝顧大申撰大申字震雉一字見山華亭人順治壬辰進士官至工部郎中大申初與同郡王廣心周茂源宋徵輿諸人唱和後又與施閏章相酬答所作有鶴巢集又有燕京倡和及泗亭諸集後自刪併爲此集故曰詩存陳伯璣撰國雅集稱其樂府於古人可謂毫髮無遺憾七律高華可追王李今觀其集大抵襲明七子之餘風可追王李庶乎近之至於樂府則談何容易也

學源堂文集十八卷

直隸總督
採進本

國朝郭棻撰棻字快圃清苑人順治壬辰進士官至翰林院侍讀學士其文頗爲華瞻惟酬應之作太多未免失於刪汰棻曾修畿輔志及保定府志今集內所載星野沿革等說皆志中之文蓋用鄂州小集載新安志序之例也

蓮龕集十五卷

江西巡撫
採進本

國朝李來泰撰來泰字仲章號石臺臨川人順治壬辰進士官工部虞衡司主事康熙己未召試博學鴻詞授翰林院侍講其制藝才藻富豔有幾社之餘風詩古文則不逮也

司勳五種集二十卷

副都御史黃
登賢家藏本

國朝王士祿撰士祿有讀史蒙拾已著錄是集一曰表餘堂詩存二卷一曰十笏草堂詩選九卷一曰辛甲集七卷一曰上浮集二卷皆古今體詩一曰炊間卮語二卷則詞也然表餘堂詩存未刻刻者實止四種耳

天延閣詩前集十六卷後集十三卷附花果會唱和詩一卷贈言集四卷

內府
藏本

國朝梅清撰清字潤公號瞿山宣城人順治甲午舉人是編分前後二集前集分十六編一曰樂府二曰稼園草三日新田集四曰燕征草五日宛東草六曰休夏集七曰驅塵集八曰越游草九曰匣琴集十曰寒江集十一曰

歸舟集十二曰嶽雲集十三曰梅花溪上集十四曰雪廬草十五曰菊閒草十六曰唱和詩以一集爲一卷卷各有序後集編年分十三卷自康熙甲寅至戊辰或以一年爲一卷或以二年爲一卷末附花果會唱和詩一卷贈言四卷則皆同人讌游酬答之作也

瞿山詩略三十三卷

安徽巡撫採進本

國朝梅清撰清舊刻有天延閣前後集皆七十以前之作版燬於火故又取未刻三卷合而編之以成此本

飲和堂集二十一卷

浙江巡撫採進本

國朝姚鼐撰夔字胃師號成菴山陰人順治甲午舉人官安化縣知縣是集凡詩十三卷曰梅軒草公車草歷游草天都草金谿草金谿又草叱馭草思唐草思唐又草三草四草五草東行草每一集爲一卷雜文八卷則分體編次其詩流易有餘頗傷圓熟文亦肉多於骨若十二種功德連珠等作尤墮入纖巧一派矣

凍亭詩略一卷

福建巡撫採進本

國朝林堯光撰堯光字覲伯莆田人順治中以選拔貢生官行人司行人近鄭王臣選莆風清籟集謂堯光伯仲詩各臻妙境而堯光尤秀拔當爲馬氏白眉然所作亦頗涉纖麗於元人蹊徑爲近也

浣亭詩略二卷浣亭歸來吟一卷附山蘊花堦長短句一卷

福建巡撫採進本

國朝林堯華撰堯華字開伯莆田人順治甲午舉人官榆次縣知縣是集浣亭詩略二卷皆早年所作浣亭歸來吟一卷皆罷官以後所作山蘊花堦長短句則附載其詞集也其詩集編次頗爲叢雜如詩略中有詠園花十四首歸來吟中有詠園花四首而其中醪醑一首一字不易殆校勘之疎歟其詩才氣雋爽早年刻意雕鐫而未造渾成晚年又頗涉頽唐縱筆太早其詞有南宋人格意而罕睹新聲亦擬議而未變化也

託素齋集十卷

浙江巡撫採進本

國朝黎士宏撰士宏字媿會長汀人順治甲午舉人官至陝西布政司參議是集詩四卷文六卷詩集凡四刻文

集凡三刻蓋積數年而彙爲一冊故每刻各體皆備士宏沒後其子文遠復合而刊之自序編少時詩好李賀文好王勃今觀集中諸作大抵多宋人未派絕無一篇與子安長吉相近者蓋嗜好雖篤而才地則與之不近也

漣漪堂遺藁二卷

浙江巡撫採進本

國朝沈峻會撰峻曾字蘇菴仁和人順治甲午副榜貢生是集爲晉安林雲銘所選定上卷爲雜文下卷爲詩末附雜言數十條皆談理之語頗近陳繼儒小品

半農齋集八卷

兩江總督採進本

國朝蔣中和撰中和字本達又字眉三靖江人順治乙未進士官蘭陽知縣遷滄州州判是集分詩文論策史說六部其文頗辨博自喜而多拾李贄餘論未脫明季町畦也

陸密菴文集二十卷錄餘二卷詩集八卷詩餘四卷

浙江鄞大節家藏本

國朝陸求可撰求可字咸一淮安人順治乙未進士官至刑部郎中其古文頗疎暢而機調多類時藝詩詞亦酬應之作居多

鶴嶺山人詩集十六卷

浙江巡撫採進本

國朝王澤宏撰澤宏字涓來黃岡人順治乙未進士官至禮部尙書是集乃其子材振所編前三卷皆題已刻詩若干首蓋皆澤宏舊作嘗爲魏憲錄入石倉詩選者四卷以下用編年體自丁巳迄庚辰題某年詩若干首附註曰未刻彙則材振所哀輯也前有魏憲原序又附其祖用子傳一篇及澤宏請復九江關一疏澤宏喜與諸名士游王士禛姜宸英洪昇等皆嘗點定其詩所作類皆和平安雅不失臺閣氣象而骨體未堅醞釀未厚尙不能凌

轍一時

恥躬堂文集二十卷

江西巡撫採進本

國朝王命岳撰命岳字伯咨號恥古晉江人順治乙未進士官至刑科都給事中是集自卷一至卷五爲奏疏卷

六至卷十七爲雜文卷十八爲詩卷十九爲周易雜卦隔中天卷二十爲讀詩隔中天據其自序謂辛卯冬夢文王周公先後車蓋喝道甚盛命岳自隔中窺視故以名也其書分十二篇大旨謂易雜卦無錯簡而以互卦之法推求其義讀詩凡五十條皆標識簡端之語一篇或止一兩句如讀簡兮曰使我懷古之情更深讀王風曰大車之淫甚於丘麻丘麻淫人大車淫鬼尤非說經之正軌也

澹餘軒集八卷

山東巡撫採進本

國朝孫光祀撰光祀字作庭號測玉歷城人順治乙未進士官至兵部侍郎是集凡文七卷詩一卷

南沙文集八卷附錄一卷

浙江巡撫採進本

國朝洪若皋撰若皋字虞隣臨海人順治乙未進士官至福建按察司僉事是集凡詩二卷文六卷其文頗以恢奇自喜然縱橫太過附錄一卷乃其鄉會試中式制藝蓋用吳伯宗榮進集例也

絲津山人詩集十八卷附楓香詞一卷緯蕭草堂詩一卷

內府藏本

國朝宋肇撰肇有滄浪小志已著錄肇所作詩有古竹園稟有嘉禾堂稟有柳湖草有將母樓稟有和松菴稟有都官草有雙江倡和集有回中集有西山倡和詩有續都官草有海上雜詩有漫堂草有漫堂倡和詩又有漫堂草凡十四集大抵沿明季詩社之習旋得旋刊出之太早故利鈍不免互見此集則肇爲江西巡撫時重自刪汰併爲一編而仍存諸集之舊目故有六首爲一卷者視舊集爲精簡矣前有汪琬劉榛二序榛序以種樹爲喻言方其初植雖一病葉不忍摘久之而繁枝茂焉又久之而岐幹斲焉亦篤論也宋楊萬里陸游竝一代巨擘而萬里誠齋集游劍南詩金磔混淆往往爲後人口實豈非愛不能割依違牽就至是乎後肇自定西陂類稟凡此集之詩皆不收毋亦學與年進悔其少作歟後附緯蕭草堂詩一卷乃其子翰林院編修至所作才力殆又亞於肇焉

精華錄訓纂十卷

大理寺卿陸錫熊家藏本

國朝王士禎撰惠棟註士禎有古懽錄棟有易漢學皆已著錄士禎晚年仿宋黃庭堅精華錄例自定其詩為此本棟祖周惕爲士禎門人故棟亦仿任淵史季溫例註之以引證浩繁每卷各分爲上下其凡例稱所採書其數百餘種悉從本書中出不敢一字拾人牙後慧然亦大槩言之耳卽以第一卷而論如溫庭筠觀歛錄蔡賢漢官典職孫氏瑞應圖陸機洛陽記沈懷遠南越志蔡邕琴操河圖括地象顧野王玉篇案今太廣益會玉篇乃宋大王之舊並非輿地志管輅別傳梁京寺記檀道鸞續晉陽秋十二書宋以來久不著錄棟何由見本書哉案棟註孫強之舊已佚書者皆冠以現存書名又棟遂於經學於詞賦所涉頗淺所引或不得原本於顯然其見者或有遺漏如註塞肌起粟字引蘇軾旅館孤眠體生粟句不知此用軾雪詩凍合玉樓寒起粟句也註吹香字引李賀山頭老桂吹古香句不知此用李頎愛敬寺古藤歌密葉吹香飯僧偏句也註麥飯字引劉克莊漢寢唐陵無麥飯句不知爲五代史家人傳語也註大漠字引程大昌北邊備對不知爲後漢書竇憲傳語也至於每條旣各自標目則其文不相連屬乃於數條共引一書者不另標名如轅固里詩註曲學字曰今上初卽位云云蓋蒙上條史記之文然不標史記而首句突稱今上是何代之帝也其體例亦間有未善案以上亦姑舉第一卷言之是書先有金榮箋註盛行於時棟書出而榮書遂爲所軋要亦勝於金註耳至於元元本本則不及其詁經之書多矣人各有能有不能不必以此註而輕棟亦不必以棟而併重此註也

漁洋詩集二十二卷續集十六卷

山東巡撫採進本

國朝王士禎撰士禎初刻落隱堂詩又刻順治丙申至辛丑所作爲阮亭詩復有過江入吳白門前後諸集後乃刪併諸作定爲漁洋前集始於丙申終於康熙己酉凡十四年之詩是集出而少作諸集悉微故今不甚傳康熙甲子又哀其辛亥至癸亥之詩十六卷爲漁洋續集蓋其爲詹事時也其時菁華方盛與天下作者馳逐矜名故平生刻意之作見於二集者爲多焉

漁洋文略十四卷

山東巡撫採進本

國朝王士禎撰益康熙乙亥士禎所自編前有其門人張雲章序士禎以詩名一時而古文特以天姿朗悟自然修潔實則非所專門雲章序謂以先生爲今之太白子美羣知非溢美矣語以先生之文昌黎柳州之文也容有或信或不信者蓋當時公論已爾而雲章必以詩文並稱非篤論矣

蠶尾集十卷續集二卷後集二卷

山東巡撫
採進本

國朝王士禎撰士禎以康熙甲子祭告南海阻雪東平望小洞庭中蠶尾山悅其清遠因取以名其山房併以名集案盛符升作雍益集序稱合戊辰至乙亥詩文爲蠶尾集十卷此集目錄下乃註詩自甲子年起其年冬及乙丑年作別爲南海集文自庚午年起士禎自序又稱偶次甲子使粵以前及丁卯以後詩文稍成卷帙因以蠶尾名集士禎集皆所自刊而三說錯互如是未喻其故文中題跋凡三卷頗足考證然皆與居易錄重出又蠶尾集序一篇旣刊卷端又刻之集中亦乖體例其續集二卷皆乙亥迄甲申之詩惟無丙子一年詩以是年奉使祭告別爲雍益集也後集二卷則戊子歸田後所作五七言絕句居十之九自序謂時方刪定洪邁萬首絕句因效爲之然是年士禎七十五歲矣殆亦精力漸減不耐爲長篇巨製也

南海集二卷

山東巡撫
採進本

國朝王士禎撰皆其奉使祭告南海往還之作上卷自京師至廣州下卷自廣州至其家新城而止蓋其北歸志亦止於新城也趙執信作談龍錄撫其開卷二詩以爲似羈臣遷客之語其言誠是然士禎之詩長於山水別爲一調未可以二馮之法繩之也

雍益集一卷

山東巡撫
採進本

國朝王士禎撰皆康熙丙子奉使祭告西岳西鎮江瀆途中所作前有其門人盛符升序述士禎自言再使秦蜀往返萬里得詩纔百餘篇皆寥寥短章無復當年蜀道南海豪放之格其門人蔣仁錫後序亦述士禎自言老耽禪寂遇事短吟略傲西竺氏偈頌不應更作文字觀也可謂明於自知者矣

論山集選一卷

山東巡撫
徐進本

國朝王士禛撰士禛字禮吉山東新城人與其兄士祿弟士禎士祐自幼以詩相唱和三人皆成進士而士禛獨以歲貢終沒後四年士禎選其遺詩三分之一刊之其詩綽有風調而才地較弱

鈍翁前後類稿一百十八卷

內府
藏本

國朝汪琬撰琬有堯峰文鈔已著錄始琬請告以前所作詩文自輯為類稿六十二卷先刊版置之堯峰皆山閣其歸田後十三年之作則輯為續稿三十卷又取明史列傳稿一百七十五首附以汪氏族譜及其父行略為別集二十六卷有周公贇者為校刻之後琬復自彙擇取其愜意者為堯峰詩文鈔屬林佶繕本刊行世間多有其本而類稿原刻遂不顯矣

七頌堂集十四卷

安徽巡撫
徐進本

國朝劉體仁撰體仁有識小錄已著錄是集凡詩八卷文四卷又空中語一卷尺牘一卷其曰七頌堂者體仁嘗慕成連陸賈司馬徽桓伊沈麟士王績韋應物之為人人為之頌故以名堂因以名集王士禎燕臺倡和集與體仁往來之作最多卷首施閏章序亦謂其詩清雋遙深然體仁欲力脫七子之窠臼而詩或生硬文或纖佻實出入於竟陵公安之閒明末山人之習未盡除也其空中語一卷皆所作豔詞故取黃庭堅語名之其於集外別行則香奩集例也

閒居草一卷

江蘇周厚
培家藏本

國朝董含撰含字榕菴華亭人董俞弟也詩名不及其兄而詩格高雅過其兄是編卷首稱藝葵草堂稿而卷中稱閒居草蓋其全集之一種也大抵蒼涼幽咽有騷人哀怨之遺而愀怳其詞知其意有所寓而莫名其寓意之所托焉

雪鴻堂文集十八卷

山東巡撫
徐進本

國朝李蕃撰著字錫徵號懶菴通江人順治丁酉舉人官黃縣知縣是集爲其子鍾襄所刊集中黃志略序謂黃有四累而塵肆宜復社甲宜均風尙宜更士習宜端稅課宜減蕃編徭役序極言派銀雜費之患他如憶堂記旱魃辨黃志跋諸篇皆汲汲以興利除弊爲事蓋有古良吏之風其文亦皆樸直不支意其人必惻惻無華故文亦如之歟然蕃之意固不在以詞藻見也

秋笳集八卷

江蘇巡撫採進本

國朝吳兆騫撰兆騫字漢槎吳江人順治丁酉舉人戊戌以科場黨緣事戍寧古塔後蒙恩赦還此集前四卷

爲徐乾學所刊後四卷爲其子振所刊而編次無序通爲八卷前三卷題秋笳集四卷題西曹雜詩五卷題秋笳前集六卷題曰擬古後雜體詩七卷曰秋笳後集八卷則五頁以前題雜著六頁以後題後集蓋隨得隨刊故舛譌如是兆騫詩天分特高風骨遒上又荷戈邊塞窮愁之語易工故當時以才人目之而立身一敗萬事瓦裂其詩亦頗爲當代所輕特其自知罪重譴輕甘心實譎但有悲苦之音而絕無怨懟君上之意猶爲可諒故仍存其目焉如兆騫者使其謹守防檢克保身名豈非國初一作手哉

改亭詩集六卷文集十六卷

江蘇巡撫採進本

國朝計東瑛東字甫草吳江人順治丁酉舉人以江南奏銷案被黜又十餘年而歿東少負奇氣中年出遊四方遍覽山川之勝詩文日富康熙癸酉宋瑩巡撫蘇州爲刻其文集其詩集則刻於戊子王廷揚所助成也王暉今世說載其客鄴城日嘗訪謝榛之墓爲樹碣表之蓋以游食四方行蹤相近故用以寄意其生平事蹟具見尤侗所作計孝廉傳亦載卷首云

庸書二十卷

江西巡撫採進本

國朝張貞生撰貞生有玉山遺響已著錄是集爲其子世坤世坊所刊第一卷爲講義十條二卷至十五卷爲文十六卷至二十卷爲詩末附館試賦一首貞生家居構我師祠又捐宅爲誠意書院講學故所作多近語錄藻麗

非所尚也

安序堂文鈔二十卷

浙江巡撫
採進本

國朝毛際可撰際可字會侯號鶴舫遂安人順治戊戌進士官彰德府推官際可與毛先舒毛奇齡有三毛之稱其學不及奇齡之博而亦不至如奇齡之強悍堅僻與先舒則鴈行矣

會侯文鈔二十卷

浙江巡撫
採進本

國朝毛際可撰此本刻於康熙己亥乃淳安方婺如所重輯

午亭集五十五卷

江蘇周厚
靖家藏本

國朝陳廷敬撰廷敬有午亭文編已著錄是集詩三十卷古樂府及古今體賦一卷經解十卷雜著十四卷蓋刻在文編之前猶未經刪定之本也

挹奎樓文集十二卷

江西巡撫
採進本

國朝林雲銘撰雲銘有楚詞燈已著錄耿精忠之叛雲銘方家居抗不從賊被囚十八月會王師破閩始得釋其志操有足多者然學問則頗爲舛陋所評註選刻大抵用時藝之法不能得古文之源本故集中諸文亦皆不入格云

吳山穀音八卷

福建巡撫
採進本

國朝林雲銘撰此其寓杭州時所作詩文故署以吳山其曰穀音則取莊子語也據自序云分爲四卷而書實八卷或刻時每卷分而爲二歟

經義齋集十八卷

翰林院孔目熊
志契家藏本

國朝熊賜履撰賜履有學統已著錄此集乃康熙庚午賜履以禮部尚書丁憂家居時所刻凡文十四卷詩四卷其名經義齋者聖祖仁皇帝所賜御題也

潔修堂集十六卷

兩江總督
採進本

國朝熊賜履撰賜履既刻經義齋集又哀輶卒未起復及癸未致仕十三年中所作以成是編而書札獨多所題匾額對聯咸附載末卷潔修堂亦聖祖仁皇帝御題之名故以名續集焉

槐軒集十卷

山東巡撫
採進本

國朝王曰高撰曰高字北山號槐軒在平人順治戊戌進士由庶吉士改給事中是集詩五卷文五卷曰高與新城王士禎兄弟相倡和耳揣目染詩格時復近之而才與學則未逮也

霞園詩集三卷文集一卷

福建巡撫
採進本

國朝鄭重撰重字山公建安人順治戊戌進士官至刑部左侍郎是集詩三卷第一卷令靖江時作第二卷爲越使吟祭告會稽南鎮時作第三卷爲秦遊草典試陝西時作又雜文一卷考重典試陝西在康熙十七年戊午使越祭告在康熙二十三年甲子今反錄越使吟於秦遊草之前殆編次者誤歟

荆南墨農全集

無卷數
江蘇
巡撫採進本

國朝徐喈鳳撰喈鳳字竹逸在興人順治戊戌進士官永昌府推官是編首曰滇遊詩集官永昌時所作次曰願息齋詩文集里居後所作又附蔭綠軒詞初集續集及秋泛詩餘兩遊詩餘四種而以荆南墨農集爲總名荆南墨農喈鳳晚年自號也

嵩菴集五卷

浙江巡撫
採進本

國朝馮甦撰甦有滇考已著錄甦官雲南時先刻有南中集會吳三桂作亂甦不屈被囚遂燬於兵歸里後詩文亦多散佚此集乃其外孫洪承澤所刻凡古今體詩三百八十餘首蓋甦晚年掇拾殘藁以付其女故承澤得而刊之也

靜菴集十二卷

江西巡撫
採進本

國朝鄭日奎撰日奎字次公貴谿人順治己亥進士改庶吉士散館授禮部主事康熙壬子與新城王士禛同典四川鄉試士禛詩所謂水部風流似鄭虔者也是集凡詩五卷又別集詩一卷文五卷中多留心時事之言又談贗一卷一名醒世格言則割記語也

日知堂文集六卷

直隸總督採進本

國朝鄭端撰端有政學錄已著錄是集凡奏疏二卷文告一卷記序書啟傳誌三卷其奏章公牘大抵曲暢事理而不以雕鏤字句爲工第三卷中狀式七頁乃呂坤實政錄中全文端爲江蘇巡撫時刊版以示所屬載其事於誌狀則可以前人之作刻於文集之中則非體例矣

世德堂集四卷

山東巡撫採進本

國朝王鉞撰鉞有粵遊日記已著錄是集文二卷詩二卷其文多通暢詳贍不爲詰屈贅牙詩學宋人而不流於纖靡一邱一壑亦自成結構在國初作者之中則未能金鼓抗行也

行素堂詩集一卷

直隸總督採進本

國朝李如芳撰如芳字仲淵高陽人其祖父明末皆死於亂如芳開闢冒死訪遺骸於兵火之中其行誼爲鄉黨所稱入國朝登順治己亥進士官鄆都縣知縣是集如芳所自編前有李壽序壽如芳諸父行也

思誠堂集二卷

山西巡撫採進本

國朝吳璵撰璵號銅川沁州人順治己亥進士官至大學士諡文端此集詩僅五十三首餘皆奏疏雜文並督撫楚中時牌示舊無刊本乾隆己丑其鄉人趙熟典始哀而刻之

古愚心言八卷

浙江巡撫採進本

國朝彭鵬撰鵬字奮斯莆田人順治庚子舉人康熙甲寅耿精忠叛逼脅受職凡九拒僞命卒得不污賊平後授三河縣知縣後官至廣東巡撫其平生以節氣著故集中多誓神之文其他奏疏案牘亦皆辭氣侃侃無所撓屈

官三河時與妻子書皆以清苦刻厲相勉足以見其爲人其他詩文則率臆而成字句皆不入格矣鵬行誼本末具載 國史至今婦女孺子人人能道其名固不必以文章傳也

聊園全集十五卷

山東巡撫探進本

國朝孔貞瑄撰貞瑄有大成樂律已著錄貞瑄少遊江淮旣而官泰安濟南繼乃遠宰大姚所歷山水頗多炎荒萬里徭俗苗境多所記載故軼聞逸事多散見於此集中其文則奇逸之氣往往不可控羈而頽唐潦倒之處亦不一而足云

葉忠節遺藁十三卷

江蘇周厚堦家藏本

國朝葉映樞撰映樞字炳霞號蒼巖上海人順治辛丑進士官至湖廣布政司參議武昌撫標叛兵夏包子作亂映樞死之 特贈工部右侍郎 賜諡忠節初映樞嘗與李基和合刻詩集朱彝尊爲之序映樞死難以後其子勇等又哀其遺文與詩合爲此集重刻之凡文八卷詩賦四卷詩餘一卷彝尊又爲之序稱映樞之節不待此區區之文以傳其論當矣

張文貞外集二卷

江蘇巡撫探進本

國朝張玉書撰玉書有文集已著錄此其外集也凡序九篇跋一篇募疏一篇祭文十七篇蓋當日刪棄之餘而後人掇拾存之者也

笠山詩選五卷

山東巡撫探進本

國朝孫蕙撰蕙有歷代循良錄已著錄是集爲汪懋麟所選定詩格清麗無塵俗之氣而邊幅微狹蓋才分弱也王士禎序稱其五七言詩雖古作者無以加亦一時獎進之言耳

谷口山房詩集十卷

陝西巡撫探進本

國朝李念慈撰念慈字祀瞻號劬菴涇陽人順治戊戌進士授河閒府推官後改補新城縣知縣以催科不力褫

職吳三桂版 大兵駐荆襄以奉檄運餉有功再授天門縣知縣康熙己未薦舉博學鴻詞試不入格而罷其詩吐屬渾雅無秦人亢厲之氣是集皆其未第以前所作故歡愉之詞少而愁苦之音多其題曰谷口山房者史稱池陽谷口在涇陽西北四十里爲念慈舊廬所在故以名其集云

證山堂集八卷

兩江督總採進本

國朝周斯盛撰斯盛字杞公鄞縣人順治辛丑進士官卽墨縣知縣嘗以事論繫出獄後奔走燕趙吳楚閒足迹半天下與李澄中洪嘉植以談詩相契其斥當時劔南流派之非力主祧宋以宗唐然筆力孱弱亦僅得唐人之形似而已

時一吟詩四卷

內府藏本

國朝黎耿然撰耿然字介菴晉江人久困諸生乃棄而從軍積功至雲南總兵官詩皆率意而成殊不入格

柴村集十九卷附錄一卷

山東巡撫採進本

國朝邱志廣撰志廣字粟海號洪區又號蝶菴諸城人柴村其世居也順治中由貢生官長清縣訓導是集文十二卷蝶菴自藥一卷蓋其箴銘語錄之類詩集五卷賦一卷末附其孫性善所著德滋堂歌詩及志廣小傳共一卷志廣少好神仙學於道士齊本守後乃從馬從龍講學故所見雜出儒墨之間其文長於議論然稱所欲言詞多不擇詩尤涉擊壤集派其甥李澄中序謂雜以詼諧出以調笑亦覺風流蘊藉罔不宏人澄中山左勝流非無鑒別殆以母黨尊行故婉詞見意歟

晚簾集七卷

福建巡撫採進本

國朝陳箴撰箴字子寶龍溪人由貢生官連城縣教諭是集文三卷詩四卷前三卷分體後一卷則不分體蓋續刻也其古文多雜偶句不古不今詩頗澤於古而不能得其格律蓋刻意有爲而限於無師者也

中巖集六卷

江西巡撫採進本

國朝宋振麟撰振麟字子禎號中巖淳化人順治中拔貢生是集於振麟歿後僅存殘藁其女孫適王氏者得而藏之至乾隆辛未女孫之子文昭官於福建乃校刊之凡詩四卷文二卷末有富平李因篤所作傳略文昭序則稱郭明府九芝延居餘園書館崑山顧亭林二曲李中孚皆執弟子禮亭林顧炎武號二曲李容號也二人皆國初通儒似不輕北面於人者存其說可矣

積書巖詩選無卷數 直隸總督採進本

國朝劉逢源撰逢源字津逮廣平人與同里申涵光相唱和是編分初集二集後附前後漫興詩各五十首逢源生當明季崎嶇轉徙於江漢淮海之間故幽憂之語多而和平之韻鮮焉

鴻逸堂藁無卷數 安徽巡撫採進本

國朝王良撰良有易贊已著錄是集前有顧祖禹序稱王子名燁蓋良本名燁作序時猶未更名也良與顧炎武等遊故文章頗有法度而謹守古格未能變化其長短均枉於是惟假師紀事內江紀事諸篇載明季流寇事頗為詳備足資參考云

稽留山人集二十卷浙江巡撫採進本

國朝陳祚明撰祚明字允倩錢塘人浙江通志稱其博學善屬文以貧傭書京師歿於客邸所著有詩二十卷詞一卷古文尤富其古文與詞今皆未見此編乃其詩集也亦名敝帚集自順治乙未至康熙癸丑凡十九年之作編年排次

止泉文集八卷戶部尚書王際華家藏本

國朝朱澤澐撰澤澐有朱子聖學考略已著錄此集乃其子光進所編凡詩一卷語錄一卷書牘四卷雜著二卷大抵亦皆講學之語蓋其生平惟以崇奉朱子為事也

性學吟二卷兩江總督採進本